

KONSEP KEADILAN SOSIAL ISLAM

Mohd Hatib Ismail¹ Siti Rohani Jasni²

¹*Pusat Penataran Ilmu dan Bahasa Universiti Malaysia Sabah*

Email:mohdhatib@ums.edu.my

²*Pusat Penataran Ilmu dan Bahasa Universiti Malaysia Sabah*

Email:s_rohani@ums.edu.my

ABSTRAK

Keadilan sosial merupakan elemen penting dalam melestarikan keamanan dan kesejahteraan manusia sejagat. Sistem sosial dalam masyarakat akan rosak apabila keadilan sosial tidak dilaksanakan dengan baik. Kesan mengabaikan keadilan akan menyebabkan masalah-masalah sosial berlaku dalam kalangan masyarakat seperti kemiskinan, jenayah, monopoli ekonomi golongan kaya dan penindasan terhadap golongan susah. Maka selari dengan hasrat slogan Malaysia Madani yang menekankan prinsip keadilan, kajian berkenaan keadilan dalam sistem sosial dan kemasyarakatan harus dijalankan. Kajian ini bertujuan untuk membincangkan konsep keadilan sosial dari perspektif Islam menerusi pemikiran tokoh pemikir Islam iaitu Mustafa al-Siba'i. Perolehan data dijalankan dengan meneliti karya tokoh-tokoh tersebut yang membincangkan soal keadilan sosial. Manakala analisis data dilakukan dengan kaedah analisis kandungan menerusi pendekatan intepretasi dan deskriptif. Hasil penelitian menunjukkan konsep keadilan sosial Islam menurut pemikiran tiga tokoh tersebut adalah berdasarkan sumber al-Quran dan al-Sunah serta pengalaman pemerintahan Islam terdahulu. Teras kepada keadilan Islam melibatkan individu, masyarakat dan pemerintah. Perkara utama dalam konsep keadilan adalah menunaikan hak-hak manusia sejagat dan melaksanakan tanggungjawab sosial. Keadilan sosial juga sangat berkaitan dengan sistem pentadbiran yang menguruskan sumber kekayaan dan pengagihan sumber tersebut. Kajian ini boleh dirujuk sebagai bacaan awal untuk mendalami konsep keadilan sosial Islam yang telah ditulis dan dibincangkan oleh tokoh-tokoh pemikiran Islam.

Kata kunci: Keadilan sosial, Islam, Pemikiran Islam

PENGENALAN

Keadilan sosial merupakan salah satu perkara yang banyak diperkatakan dan diperbincangkan oleh para pemikir barat mahupun Islam. Keadilan sosial merupakan suatu bentuk konsep ataupun teori yang dikemukakan bagi membentuk sebuah masyarakat yang harmoni hidup dalam keadaan semuanya menerima kehidupan berlandaskan keadilan. Kemelut dan kepincangan di dalam masyarakat dari aspek ekonomi, politik, pendidikan dan penindasan terhadap pihak yang lemah terjadi apabila keadilan sosial tidak dapat ditegakkan dengan sebaiknya. Isu keadilan sosial sentiasa berlegar dalam sejarah hidup manusia hingga sekarang dan menjadi punca kepada perpecahan dan ketidakstabilan dalam sesetengah masyarakat dan negara yang mana boleh menimbulkan konflik, permusuhan, kacau bilau serta pemberontakan. Ramai rakyat yang

menderita tiada pembelaan, ada yang terperosok dalam lembah kemiskinan, tidak kurang juga yang tidak mendapat peluang untuk meningkatkan taraf hidup ke arah lebih sempurna. Maka dengan sebab itu, kajian ini terpanggil untuk menyentuh soal keadilan sosial secara langsung berdasarkan pandangan seorang tokoh intelektual Muslim Mustafa al-Siba^{ci}.

KONSEP KEADILAN SOSIAL ISLAM

Penjelasan dan huraian kepada keadilan sosial perlu dilihat kepada pengertian keadilan itu sendiri. Berdasarkan maksud keadilan maka konsep keadilan sosial dapat dilihat pada idea dan perlaksanaannya dalam kehidupan sosial. Keadilan melibatkan kesamarataan dan kesaksamaan, keadilan melibatkan kejujuran dalam tindakan, keadilan melibatkan menunaikan kewajipan, keadilan melibatkan memberi kepada yang berhak, keadilan melibatkan tanggungjawab, keadilan melibatkan kebenaran dan keadilan melibatkan melaksanakan tanggungjawab. Dalam bentuk keadilan sosial pula, semua perkara yang dimaksudkan keadilan berkait bersama, iaitu dalam konsep keadilan sosial kehidupan individu dan masyarakat serta pemerintahan Negara dan rakyat melibatkan soal keadilan.

Keadilan atau adil datangnya dari perkataan arab *al-^cadl*, melalui kata kerja *adala*. disebut dalam arab keadilan itu sebagai *al-^cadl* atau *al-^cadalah*. Keadilan juga disebut dengan *al-qist*, *al-mizan* dan *al-haq*. Dalam bahasa Inggeris, keadilan disebut sebagai *justice*, atau dengan nama lain seperti *righteousness*, *equity*, *fairness*, *lawful*, *rightful*, *legality* dan *counterbalance* (Zul 'Azmi 2005). Dalam bahasa arab perkataan *al-^cadl* dan *al-^cadalah* selalu digunakan dan dikenali membawa maksud yang tepat kepada keadilan, manakala dalam bahasa inggeris perkataan *justice* kerap digunakan untuk memberi maksud keadilan.

Keadilan ditafsir dan diterjemah ke dalam makna yang luas supaya ia bertepatan dengan perbuatan dan tingkah laku manusia. Keadilan telah diberi maksud suatu jalan yang lurus seperti tulisan Ibn Manzur (1887) iaitu berada dalam landasan yang betul dan tidak tergelincir ke arah lain. Menurut Imam al-Ghazali pula, keadilan merupakan ketertiban yang tersusun baik dan sesuai pada tempatnya. Dalam konteks sosial, keadilan dilihat sebagai tindakan atau kelakuan seseorang yang mengambil apa yang berhak ke atas dirinya dan memberikan kepada orang lain apa yang berhak ke atas orang itu. Manakala Imam al-Shafi^{ci} meletakkan maksud keadilan sebagai tindakan manusia yang berdasarkan kepatuhan kepada Allah s.w.t, keadilan sebagai tindakan manusia yang berdasarkan syariat Islam (Zul 'Azmi 2005).

Menurut al-Siba^{ci} maksud keadilan sosial ialah memberi kesamarataan kepada mereka memerlukan dengan berbuat baik kepada mereka, mencukupkan keperluan mereka, memudahkan pekerjaan dan membantu kekurangan mereka. Al-Siba^{ci} (1960) menjelaskan antara maksud membuat kebaikan adalah elok ketika melakukan urusan, bagus dalam pergaulan dan ketinggian akhlak. Kebaikan juga membawa maksud mengeluarkan harta dan tenaga pada jalan Allah iaitu jalan yang membawa kepada kebenaran, kebaikan dan bermanfaat. Seterusnya kebaikan juga dimaksudkan dengan solat dan mengeluarkan zakat. Dalam hal mencukupkan keperluan hidup al-Siba^{ci} menerangkan bahawa keperluan asas bagi manusia adalah mempunyai makanan, memiliki pakaian, ada tempat tinggal. Selagi mana keperluan asas manusia tidak dicukupkan, maka manusia tersebut masih memerlukan pertolongan daripada masyarakat ataupun pemerintah. Bahkan menjadi suatu kewajipan bagi yang mampu untuk mencukupkan keperluan mereka kerana hal itu

juga merupakan salah satu daripada kemaslahatan ummah. Manakala dalam memudahkan pekerjaan, al-Siba^{ci} (1960) ada menyatakan mengenai prinsip-prinsip umum untuk pekerja, di antaranya adalah memberi pekerjaan yang sesuai berdasarkan kemampuan dan kebolehan masing-masing. Tempoh masa bekerja juga mesti ditetapkan berdasarkan gaji yang diberi, jika majikan mahu untuk melebihi masa bekerja, maka majikan perlu menambah jumlah gaji untuk pekerja.

Seterusnya al-Siba^{ci} (1988) menghuraikan keadilan sosial ialah memberikan setiap sesuatu yang hak pada haknya, sehingga merasa dia merasa kemuliaanya, mendapat ketenangan dalam kehidupan dan menikmati kesejahteraan hidup. Al-Siba^c menghuraikan maksud keadilan adalah memberi hak kepada haknya melibatkan setiap lapisan masyarakat. Seperti dalam kehidupan berumahtangga, Islam telah menetapkan bagi suami wajib untuk menunaikan segala hak isteri dan menyuruh isteri taat kepada suami selagi mana tidak bersalahan dengan syariat Islam. Kepimpinan dalam hal berkaitan rumahtangga mestilah dilaksanakan dengan tidak melakukan perbuatan yang bersifat zalim dan mendatangkan permusuhan. Begitu juga dengan anak-anak wajib menunaikan tanggungjawab sebagai seorang anak memberi hak yang sepatutnya kepada kedua ibu bapa dan berbuat baik kepada mereka. Al-Siba^{ci} (1988) juga berpendapat hak seseorang perlu dijaga terutamanya dalam urusan jual beli dan muamalat. Tidak boleh mengambil harta hak orang lain tanpa pengetahuan dan keizinan daripadanya serta menipu dalam urusan jual beli. Hak tersebut perlu ditegakkan oleh seorang hakim dalam mengadili sesuatu perkara, seorang hakim tidak boleh membuat keputusan mengikut hawa nafsu dan menghukum orang yang tidak bersalah. Dalam hubungan pemerintah dan rakyat, pemerintah perlu untuk berusaha menunaikan hak-hak rakyatnya, beramanah dalam menguruskan Negara dan menghindari kezaliman ketika memerintah. Manakala rakyat pula menunaikan hak kepada pemerintah dengan mentaati kerajaan selagi tertegaknya kerajaan tersebut di atas jalan kebenaran, melakukan kebaikan dan berterusan dalam kebaikan.

Al-Siba^{ci} (1998) seterusnya menjelaskan bentuk pelaksanaan keadilan sosial dalam melalui jaminan sosial adalah memberi *infaq* kepada golongan-golongan yang memerlukan, *infaq* mendatangkan manfaat kepada masyarakat dan memberi kelebihan untuk kehidupan dan kehormatan. *Infaq* yang disebut oleh al-Siba^{ci} adalah merupakan sesuatu yang amat digalakkan oleh Islam bagi membolehkan mereka yang berada pada kesusahan dalam kalangan masyarakat dapat berkongsi manfaat kekayaan bersama. Hasil daripada perkongsian tersebut boleh mengurangkan kesusahan orang lain serta menjamin masyarakat untuk hidup dengan kurang kadar kemiskinan.

KESIMPULAN

Para sarjana barat dan Islam pada era moden mengupas dan membincangkan konsep keadilan sosial supaya ianya dapat direalisasikan dalam kehidupan bermasyarakat. Cita-cita keadilan menjadi pendorong dalam aspek penulisan dan pengkajian bagi gerakan intelektual dan kebudayaan. Oleh itu, persekitaran pemikiran mula disuburkan dengan kepekaan terhadap keadilan. Masih banyak soal keadilan sosial yang perlu kita fikirkan yang menjadi masalah dalam penerapan kehidupan bernegara dan juga bermasyarakat. Oleh itu, perkembangan intelektual pada era moden dan pascamoden tidak dapat lari daripada membangkitkan semula soal keadilan sosial supaya ianya dapat terus diformulakan dengan cara sebaik mungkin untuk mempertahankan kehidupan yang berteraskan keadilan bersifat menyeluruh.

RUJUKAN

- Hamka, (1977), *Keadilan Sosial dalam Islam*. Kuala Lumpur: Penerbitan Pustaka Antara.
- Kassim Ahmad, (1980), *Risalah Masalah Teori Sosial Moden Islam*. Petaling Jaya: Penerbitan Pena Sdn. Bhd.
- Al-Siba'i, Mustafa, (1960), *Al-Ishtirakiyyah al-Islam*. Al-Qahirah: al-Dar al-Qawmiyah.
- Al-Siba'i, Mustafa, (1997), *Al-Takaful al-Ijtima'i fi al-Islam*. Riyadh: Dar al-Warraq.
- Al-Siba'i, Mustafa, (1988), *Haza Huwa al-Islam Silsilah Rasa'il Tabhasu an al-Fikrah al-Islam al-Hadithah*. Jil 1. Damascus: Maktabah al-Islami.
- Al-Siba'i, Mustafa, (1998), *Uzama'una fi al-Tarikh*. al-Qahirah: Dar al-Salam.
- Rawls, John, (1971), *A Theory of Justice*. United Kingdom: Harvard University Press.
- Qutb, Sayyid, (1984), *Keadilan Sosial dalam Islam*. terj. Afif Mohammad. Bandung: Penerbit Pustaka.
- Zul'Azmi Yaakob, (2005), *Konsep Keadilan dalam Pemikiran Akhlak Aristotle (M.322 SM) dan Ibn Miskawayh (M. 1030 M)*. Tesis Sarjana. Bangi: Universiti Kebangsaan Malaysia